

Segera bersih, dalamkan sungai punca banjir kilat Janda Baik

Oleh **Asrol Awang** - Mei 14, 2022 @ 6:26pm

bhnews@bh.com.my

KUANTAN: Pemangku Raja Pahang menitahkan kerajaan negeri dengan kerjasama Kementerian Alam Sekitar dan Air (KASA) menyegerakan kerja membersihkan dan mendalamkan sungai yang menjadi punca utama banjir kilat di Janda Baik, Bentong, Rabu lalu.

Tengku Hassanal Ibrahim Alam Shah Ibni Al-Sultan Abdullah Ri'ayatuddin Al-Mustaffah Billah Shah juga bertitah supaya Projek Rancangan Tebatan Banjir (RTB) Sungai Bentong dilaksanakan dengan segera.

Selain itu, Tengku Mahkota mahu Pelan Induk Saliran Mesra Alam (PISMA) di Bentong, termasuk pembinaan Stesen Telemetri dan Stesen Amaran Banjir di hulu kawasan Janda Baik, turut disegerakan.



Tengku Hassanal Ibrahim Alam Shah.

"Pada tahun lalu, Pahang telah dilanda banjir sebanyak dua kali, iaitu pada awal dan akhir tahun. Beberapa siri kejadian banjir kilat juga telah berlaku disebabkan hujan yang amat lebat.

"Justeru, kerja membersih dan mendalamkan sungai ini juga perlu dilakukan, bukan sahaja di kawasan Janda Baik, malah di semua sungai dan saliran yang telah cetek dan banyak mendapan di seluruh negeri akibat kejadian banjir terbabit.

"Saya titah agar pelaksanaan kerja-kerja pembersihan semua sungai dan saliran terbabit mesti dilaksanakan segera oleh kerajaan negeri dan Kerajaan Persekutuan sebelum negara memasuki musim Monsun Timur Laut pada hujung tahun ini," titah Pemangku Raja Pahang dalam kenyataan media, hari ini.

Tengku Hassan Ibrahim turut menziarahi mangsa banjir di kawasan Janda Baik semalam dan menghulurkan sumbangan, selain melawat kawasan terjejas dan mendengar taklimat mengenai tindakan susulan segera tebatan banjir bagi mengurangkan risiko bencana berkenaan.

"Saya mengambil maklum bahawa hujan lebat luar biasa pada 11 Mei lalu dengan kelebatan 87.5 milimeter (mm) selama tiga jam bermula pada jam 4 pagi di Bentong, mengakibatkan banjir kilat di beberapa kawasan," katanya.

Kawasan terlibat seperti Kampung Janda Baik, Kampung Sum-Sum, Kampung Cheringin, Kampung Chemperoh dan Kampung Lampin.



Keadaan pasca banjir di Kampung Sum Sum, Janda Baik semalam. - NSTP/FARIZUL HAFIZ AWANG